


KA RUKOM SHET IA
KI JINGBAM-KHASI



da

U Kitbor W. Nongrum

1991

U Putharo, u Pulum, u Pudoh, u Pusaw, u Pusyep,
u Pu-Tyndong, bad kiwei kiwei

*This book is published with the financial assistance
from the State Government of Meghalaya.*

Acc. No. 6800/2, NB.
Class No 895.93 N.73. Rule
Author Nonglum, K. N.
Title Ka Ruckem Shet Sq. k.

Acc. No. 6800/2 NB.
STATE CENTRAL LIBRARY
GOVERNMENT OF MEGHALAYA
S H I L L O N G

1. Books may be retained for a period not exceeding 15 days by members.
2. Books may be renewed on request at the discretion of the Librarian.
3. Dog-earing the pages of a book, marking or writing therein with ink or pencil, tearing or taking out its pages or otherwise damaging it, will constitute an injury to a book.
4. *Any such injury to a book is a serious offence; Unless a borrower points out the injury at the time of borrowing the book, he/she shall be required to replace the book or pay its price.*

Help to keep this book fresh & clean

Ka Bukom Shet Ia Ki Jingham Khasi

KI JINGKDEW :—

	Sla
1. U Putharo lane u Pesaraw ...	1
2. U Pułum ...	3
3. U Pudoh ...	5
4. U Pusaw ...	7
5. U Pusyep bad u Pumaloi ...	8
6. U Pu-Tyndong ...	11
7. U Punei ...	13
8. U Pukhleĩñ ...	14
9. U Pusla lane u Pumitbai ...	17
10. U Puryusi ...	18
11. Ka Jashulia ...	19
12. U Shira ...	21
13. Ka Ja-riewhadem bad u Pyr- thiew-hadem ...	22
14. U Piroid ...	25
15. Ka Ja-krai ...	25
16. U Rymbai-ja ...	28
17. U Phankaro ...	29
18. U Phan ...	31
19. U Phandieng ...	33
20. Ka Shriew ...	36

State Comptroller

★

895.42

7-3. Ruk
Shriew Shilong

SHI KYNTIEN AR KYNTIEN NA U NONGTHOH

Da kaba fiewkor ia ka rukom shet ia ki jingbam Khasi, nga la pyrshang ban buh ha ka jingthoh ia ka rukom shet ia kine ki jingbam :— U Putharo, u Pulum, U Pudoh, U Pusaw, U Pusyep bad u Pumaloi, u Pu-tyndong, u Punel, u Pukhleif, u Pusla, lane u Pumithai, u Purnai, ka Jashulia, u Shlra, ka Ja-riewhadem bad u Pyrthiew-hadem, u Piroid, ka Ja-krai, u Rymbai-ja, u Phankaro, u Phan, u Phandieng bad ka Shriew.

Ha ka liang kaba pynmih ia kane ka kot—
Ka Rukom shet ia ki Jingbam - Khasi, nga pynpaw ia ka jingsngewnguh kaba khraw ia kito ki Longkmie ki Longkpa kiba tip bha shaphang ka rukom shet ja ia ki jingbam - Khasi ba ki la iarap ban ai ka jingtip ba bniah. Kumjuh ruh ka jingsngewnguh kaba khraw ka leit sha I kong T. Rynjah bad kiwei klwei de ki longkmie bad ki longkpa kiba la pyllait por kyrpang ban pule ia ka *manuscript* jolg kane ka kot bad kiba la ai jingmut bad ai mynsiem ruh.

Nga kyrmen ba kane ka kot kan ai ka jingmyntoi ia kito kiba kwah ban shet ia kitei ki jingbam - Khasi. Nga kloj ruh ban pdiang ia kane kano ka jingai jingmut ha ka liang ban nang pyn bha ia kane ka kot.

20 Tarik, u Iaiong, 1983

State Central Library
Kithor W. Nongrum
Nongthoh.
Meghalaya, Shillong

[iii]

KA JINGKYNTHOH

* Na ka bynta ban pynbiang ia ki jingkwah jōng ki Nongpule nga pynmih bianz ia kane ka kot. Nga pynpaw ia ka jingsngewnguh ia a Education Department, Government of Meghalaya kaba la larap bei pisa lem katto katne ha kaba shon ia kane ka kot.

(Sien Shon kaba Ar — 1991)

21.1-1991

Nongthoh.

I Bah Kitbor W. Nongrum ha kane ka kot—
Ka Rukom shet ia ki jingbam-Khasi. I la pyrshang ban ai jingtip ia ngi shaphang ka rukom shet jingbam Khasi. La shisha baroh na ngi ngi shait bam hynrei ngim nang kumno ban shet ia ki. Lada kawei-pa-kawei ka rympei Khasi ka nang ban shet ia la ki jait jingbam kata ka pynpaw ba ngi niw-kor ia la ka rukom bam rukom dih Khasi.

Ngi kum ki kynthei ngi ai khublei ia I Bah Kit ba i la ia leh shitom ban pynmih ia kane ka kot kaba kham iadei bad ngi ki kynthei.

Kanch Trace View
Kanch's Trace
26. 9. 1981

Miss T Rynjah,
Head of the Khasi Department
Sankardev College, Shillong.

U Putharo (ne U Pusaraw)

Ia u Putharo (ne pusaraw ne u puwasaiñ) ki shet da u khaw-Khasi.

Pdem shuwa ia u khaw ha ka um bad hadien katto katne kynta sa jlar noh ia ka um. Nangta ia u khaw ba la pdem sa dung ha u thlong hadub ban da ni. Khnang ba u khaw kpu un long uba ni dei ban da kyrsih ha ka shalani kaba ni ne ka jar-nar kaba ni.

Theh ia u khaw-kpu ha ka um syaid, khleh da ka kti bad sa king da ka siang ia u khaw-kpu haduh ba un da um. Ka um syaid ha kaba pyndonkam ka dei ban long kaba la pynthnam shuwa bad sa da buh pynpjah harud. Ka um ka dei ban long kaba shu syaid blom blom. Ka jingkhleh um ia u khaw-kpu ka dei ban long ha kata ka rukom ba u kpu um dei ban rben lane stang. Lada jia ba ka jingkhleh ka stang lane ka bunum, u putharo un jem palat. Lada ka jingkhleh ka rben ne duna um, u putharo un eh.

Ka rukom khleh um ia u khaw-kpu ka shong ha u jait khaw. Lada^{shot} putharo da u khaw-mynri, dei ban khleh duna ka um ban ia kiwei pat ki jait khaw-Khasi.

★ CHECKED ★

Meeth... Shillons

Ia u putharo ki shet ha ka khiew-saraw. Donkam kawei ka khiew shet (ka khiew-saraw) kaba kum ka pliang, kaba ki khot ka khiew-kmie. Ka don ruh sa ka khiew-jingtap ka ban tap ha ka khiew-kmie ia kaba ngi khot ka khiew-khun. Khnang ban kham kloi haba shet, dei ban pyn-donkam artylli ki khiew-khun.

Haba shet Putharo, ka ding ka dei ban meh bha. Ia ki khiew-khun ki buh lane thang hapoh ding ba kin khluit lypa. Ia ka khiew shet ki tiew ha ding.

Nangta, sa tong ia u khaw-kpu ba la dep khleh um bad theh ha ka khiew kaba la tiew pynkhluit ha ding. Mar kum-ta, sa tap da ka jingtap lane ka khiew khun kaba la thang pynkhluit lypa. (Don ruh kiba da synreit um khyndiat halor ka khiew-khun ynda haba ki tap ia u khaw-kpu). Kumta ka jingkhluit jong ka khiew-kmie bad ka khiew-khun kaba nalar ka saifi dur ia u putharo. Tang kumba 2 ne 3 minit ei ei u putharo u la ih. Kata ka mut, ynda u kpu hapoh u khiew u la phuh, sa khat noh ia u putharo da ka siang. Ka siang ka dei ban long kaba stang na khmut khnang ban suk haba khat ia u putharo.

Kumba la ong haneng, pyndonkam artylli ki jingtap lane ki khiew-khun khnang ban kham kloi haba shet. Kata ka mut, katba kawel ka khiew-khun ka dang tap ia u kpu ba shet, kawel pat lah ban nang pynkhluit lypa. Sa song ia u putharo ha ka lakait lane ka lamet khnang ba un shong jem.

o0o

U Pulum

Ia u Pulum ki shet da u khaw-Khasi.

Pdem shuwa ia u khaw ha ka um bad badien katto katne kynta jiar noh ia ka um shuwa ban dung. Dung ia u khaw ba la dep pdem ha u thlong haduh ban da ni.

Buh ia u khaw-kpu ha ka dabor ne u prah bad sa khleh um khyndiat khyndiat. Khñiot ia u khaw-kpu haduh ba un da puah bha. Na u khaw-kpu ba la dep khñiot sa dkbak khyndiat khyndiat katkum ka jingheh jingrit u kpu u ban shet bad sa thap pynstang da ki kti.

Tiew lypa ha ding ia u khiew-shet ba don um. Ha trai u khiew ba don

um, siang lypa ka sla lane u kynja skum khnang ba u kpu ban shet un nym dambit ha u khiew. Ynda ka um ka la thnam, sa thep la ki khaw-kpu ba la thap pynstang.

Ynda la kheĩn por ba u la ih, sa khat noh ia u Pulum. Ia u Pulum uba dang shu dep khat na ka um-thnam dei ban pdem ha ka um pjah bad sa sait noh ia u Pulum. Ia u Pulum uba dang khat na ka um thnam dei ban pdem ha ka um pjah bad sa sait noh ia u kpu uba dambit khnang ba un nym sma lada jia ba u sah katto katne sngi. Sa song ia u pulum ha ka sla.

Ia u Pulum lah ban shet ruh ha kane ka rukom :

Song lypa ha ka sla ia u khaw-kpu ba la dep thap pynstang bad sa thep ha ka um ba la tiew pynthnam ha ding. Ynda la kheĩn por ba u la ih, sa khat noh ia u pulum.

U Pudoh

Ia u Pudoh ki shet da u khaw-Khasi.

Pdem shuwa ia u khaw ha ka um. Hadien katto katne kynta sa jiar noh ia ka um shuwa ban dung. Dung ia u khaw ba la dep pdem ha u thlong haduh ban da ni.

Lah ban shet ia u pudoh ha kine ki rukom :

(a) Buh ia u khaw-kpu ha ka dabor ne u prah, ber mluh kat ban biang, bad khleh um khyndiat khyndiat bad sa khñlot, haduh ba un da pnah. Na u khaw-kpu ba la dep khñlot, dkhat khyndiat khyndiat katkum ka jingheh jingrit u pudoh ban shet bad thap pynstang da ka kti.

Ha uwei na u khaw-kpu ba la thap pynstang sa buh ka dohsniang kaba la ot rit lypa. Nangta tap sa uwei pat u khaw-kpu ba la thap pynstang. Pyndait lang ia ki khaw-kpu da kaba thap da ki kti khnang ba ka doh kan nym mih shabar. Song ia u khaw-kpu ba don doh ha ka sla bad sa thep ha ka um kaba la tiew pynthnam ha ding. Ynda la kheñ por ba u la ih, sa khat noh ia u pudoh na ka um thnam.

(b) Kawei pat ka rukom shet pudoh ka long da kaba shet pynih shuwa ia ka dohsniang kaba la ih bad sa ber mluh kat ban bang.

Buh ia u khaw-kpu ha ka dabor ne prah. Khleh lang ia u khaw-kpu bad ka um kaba phon dohsniang. Khñiot ia u khaw-kpu haduh ba un da pnah. Nangta, dkhat khyndiat khyndiat katkum ka jing-heh ne jingrit u pudoh ban shet bad thap pynstang da ki kti. Buh ia ka doh ba la ot rit bad ber mluh ha u khaw-kpu ba la thap pynstang. Kli pyllon ia u khaw-kpu ba un tap ia ka doh bad sa thap pynstang biang. Nangta, sa thep ha ka um kaba la tiew pynthnam lypa ha ding. Shuwa ban thep ia u Pudoh ha ka umthnam, dei ban da siang sla lane u kynja skum ha trai u khiew-um khnang ba u kpu un nym dambit. Ynda la kheñ por ba u pudoh u la ih, sa khat noh na ka um thnam bad buh ha ka um pjah. Sait noh ia ia u kpu uba dambit halor khnang ba un nym sma lada jia ba u sah katto katne sngi.

U Pusaw

Ia u Pusaw ki shet da u khasi-Khasi.

Pdem shipor ia u khaw ha ka um bad da jlar noh ia ka um. Pynrkhleng ia u khaw ba la pdem shuwa ban dung. Dung ia u khaw ha u thlong haduh ban da ni. Da kyrsih da ka shalani lane ka jar-nar kaba ni khnang ba u kpu u ban shet un long uba ni bha.

Ha u khaw-kpu, ber khyndiat u soda-bam bad sa king ha ka um kaqa syaid blom-blom. Ka jingber ia u soda-bam ka long ba u kpu un phuh haba shet. Ai um tang khyndiat khnang ba u kpu un shu sboh malu-mala.

Theh ia u khaw-kpu ba la dep khleh bha ha ka narsdieh ha kaba la tiew pynih ia ka umphniang-bam lane ka khleinh sniang. Tang mar ia dep theh ia u khaw-kpu ha ka nar sdieh sa tap khop ia u kpu. Pynran noh ia ki tyllaw ding bad ai kan rhem tang da u rnga. Hadien, kumba 10 ne 15 minit ei ei sa lied ia ka jingtap. Lada u kpu' u la par umphniang ka pyni ba ka la biang ban kylla noh ia u kpu. Khnang ba u kpu un nym pait haba kylla, dei ban kylla barabor da

kaba shu pynkylla khongpong ia ka nar
 sdieh ha kata ka rukom ba u kpu un
 shong ha ka jingtap. Shim sa kawei ka
 pliang bad tap ia ia u kpu uba don ha
 ka jingtap. Pynkylla khongpong ia ka
 jingtap bad u kpu un shong pat ha ka
 pliang. Ia u kpu uba don ha ka pliang
 sa pynkylla khongpong ha ka nar sdieh.
 Ha kane ka rukom, u kpu uba shong
 nyngkong shapoh mynta u shong pat
 halor. Tap biang ia ka jingtap narsdieh.
 Halor ka jingtap sa buh khyndiat u rnga
 ba rhem khnang ba u kpu un ih ryngkat,
 Hadien kumba 10 ne 15 mlnit ei ei sa lied
 ia ka jingtap. Tied da ka kti lane ka
 siang, lada u la riew pduk pduk ka pyni
 ba u pusaw u la ih.

Rah noh ia u pusaw bad pynpjah
 shiphang arphang. Nangta sa ot nuid kat
 ban biang bam.

o0o

U Pusyep Bad Pu-Maloi

Ia u Pusyep lane u Pumaloi ki shet
 da u khaw-Khasi.

Pdem shuwa ia u khaw ha ka um.
 Har noh ia ka um shuwa ban dung.

Dung ia u khaw ha u thlong haduh ban da ni. Ia u khaw-kpu da kyrshih ha ka shalani lane ka jarnar kaba ni. Synreit um malu mala ha u khaw-kpu. Pynkhih lane khleh ha kata ka rukom ba un nym dambit.

Khat biang ia u khaw ha ka shalani lane ha ka jarnar kaba ni bad sa kyrshut. Ynda la dep kyrshut da ka kti, u khaw-kpu uba mib lyngba ka shalani lane ka jarnar u la long uba bit ban shet Pusyep lane Pumaloi.

Shuwa ban shet la u Pusyep ne Pumaloi, tiew ia u khiew-um ha ding. Ia ka shyntur u khiew-um tap da kano kano ka jingtap kaba pei thlew syriem kum ka shar. Dei ban jied da ka jingtap kaba ia biang bad ka shyntur jong uta u khiew um. Buh la ka jingtap ha kata ka rukom ba ka bynta kaba pei thliw kan shong shapoh. Lane lah ban tap ruh da u klong uba la ot ha ka dur ka shar ha kata ka rukom ba ka thliw kaba rit kan shong hapoh bad ka thliw kaba iar kan shong halor u khlew. Nangta, ia ka jingtap-khiew satah bha da ka jabih * baroh sawdong khnang ha

Jabih : Ngï loh da kaba dung pnah ia ka ja bad u skop—kba.

ka jinghaw um kan nym lait shabar; ha kata ka rukom ba ka jinghaw um na u khlew kan mih beit tang na ka thliew kaba ha ka jingtap.

Ynda ka um ha u khiew ka la thnam bha, kata ka mut ynda ka jinghaw ka la mih shabar na ka thliew jong ka jingtap, sa pynkhreh ban thep ia u khaw-kpu.

Ia u khaw-kpu uba la dep khleh kumba la batai haneng, sa thep ha ka kynja bul lane maloi bad tap da ka jaiñ stang kaba sngem. Ka jaiñ ka dei ban long kaba kham-heh ia ka bul lane ka maloi khnang ban biang haba thep bad sei na u khlew shet. Ia ka bul lane ka maloi ba don khaw-kpu bad kaba la tap jaiñ sngem sa pynkylla khongpong bad tynrong ha ka jingtap jong u khiew uba la tiew pynthnam ha ding. Pynshong ia ka bul lane ka maloi ha kata ka rukom ba u khaw-kpu un phal sha ka liang ka thliew jong ka jingtap. U khaw-kpu ha ka bul lane ka maloi un nym liat namar ba ka iada ka jaiñ. Ha kane ka rukom ka jinghaw-um kaba mih na u khiew, ka leit rung hapoh u khaw-kpu.

Ynda la kheiñ por ba u pusyep ne pumaloi u la ih, sa weng noh ia ka bul

lane ka maloi. Nangta weng noh ia ka jaiñ
na u pusyep lane u pumaloi. Ka jaiñ
kam ju dambit haba la pynsngem um
ia ka shuwa ban shet. Shuwa ban thep
ia u khaw-kpu dei ban da ñiad ia ka
bul lane maloi da ka jaiñ sngem bad
nangta sa da ka jaiñ rkhiang khnang ba
u kpu un nym dambit ynda la ih.

Haba shet **pusyep** dei ban pyndonkam
da ka bul lane maloi kaba kham heh.
Ia u pumaloi pat ki pyndonkam da ka
bul lane maloi kaba kham rit. U Puma-
loi u shim por tang kumba shiminit ei
ei ba un ih. U pusyep pat u shim por
kumba 3 ne 4 minit ei ei ba un ih.

Ia u Pusyep lane u Pumaloi uba la
ih sa song ha ka sla.

o0o

U Putyndong

Ia u Putyndong ki shet da u khaw-Khasi.

Pdem shuwa ia u khaw ha ka um.
Jiar noh ia ka um shuwa ban dung.
Dung ia u khaw ha u thlong haduh ba
un da long kpu. Ia u khaw ba la dep
dung dei ban da kyrsih ha ka sbalan
lane ka jar-nar kabə ni,

Nangta sa thep ia u khaw-kpu ha ka tyndong siej lane kan kham bha ban da synreit um malu mala halor u khaw-kpu shuwa ban thep ha ka tyndong siej. Pyndonkam da ka tyndong siej kaba lung bad da kaba dang dep pom. Kata ka mut da ka siej kaba dang shongum, Pyndonkam da ka siej-khlaw (siej-lieh).

Ia u khaw-kpu dei ban thep pyn-duna khyndiat ha ka tyndong, khnang ban ai jaka ia u Putyndong ba un khie ynda la ih. Ynda la dep thep, sa set noh ia ka shyntur ka tyndong-siej da ka sla.

Ia ki tyndong ba la dep thep khaw-kpu-sa pynthlah kynriang ha fu mawbyr-slew ban long pynshad la ka tyndong. Sliew ding napoh. Ka kham bha ban sllew habar haba shet Putyndong.

Ynda la kheif por ba u kpu u la ih kata ka long ynda ka um syep ka la jah na ka shyntur ka tyndong sa sei noh ia ki tyndong siej na ding. Ia kine ki tyndong-siej ba ingkhong sa pied noh ia ka snep siej. U Putyndong ynda u la ih u sa dap ha ka tyndong.

Ha kane ka rukom, u Putyndong u la long ban bam lane ban leit die sha lew.

U Punei

Ia u Punei (ne u Punai) ki shet da u khaw bad u nei-lieh. Ki ju kham shet da u khaw-mynri.

Pdem shuwa ia u khaw ha ka um. Jiar noh ia ka um shuwa ban dung. Dung ia u khaw ha u thlong haduh ban da ni.

Dung im ia u nei-lieh ha u thlong haduh ba un da ni bha. Lada pyndon-kam da u nei-lieh uba la sdieh lypa, u lah ban ingkhong noh ynda shet kpu.

Khleh lang ia u nei-lieh ba la dep dung ha ka um pjah. Ber khyndiat u shynrai bad ka mluh kat ban biang. Ynda la khleh bha ia u nei-lieh, u shynrai bad ka mluh, sa thep ia u khaw-kpu khyndiat khyndiat ha ka um bad sa king da ka siang haduh ban da mlai bha.

Ynda ka jingkhleh ka la biang, tong da ka siang bad thep ha ka umphniang ba la tiew pynh ha ding. Kan kham bha ban shet ha ka nar-sdich. Shet da u kpu uba rit. Lah ban shet bun tylli shisen

shet ha ka nar-sdieh. Tang hapdeng shi
minit ne ar minit u Punei u la ih.

Ka jingkhleh : —

- (1) 1 kilo u khaw (2) kumba shi pela shiteng
u neilieh (3) u shynrai tang ha i kbmüt shamoit
(4) ka mluh kat ban biang.

o0o

U Pukhleñ

Ia u Pukhleñ ki shet da u khaw-
Khasi. Lah ruh ban shet da u khaw
khar (u khaw dungkor).

Haba shet pukhleñ donkam u khaw-
kpu, ka um mithai, u soda-bam bad ka
umphniang-bam lane ka kbleñ-sniang.

Pdem shuwa ia u khaw ha ka um-
badien katto katne kynta sa jiar nob ia
ka um shuwa ban dung. Dung ia u khaw
haduh ban da ni. Khnang ba u kpu un
kham ni dei ban da kyrsih ha ka sha-
lani kaba ni.

King lang ia u khaw-kpu ha ka
um-mithai.

Ka um-mithai ka dei kaba la pynum na ka mithai kaba la tiew pynkhluit bad bad ka um. Haba pynum ia ka mithai, ka um ka dei ban tap ia ka mithai. Ia ka um-mithai dei ban da jiar bha ha ka jingjiar-sha khnang ba kan long kaba khuid shuwa ban khleh lang bad u khaw-kpu. Ka mithai ka ban shet pukhleĩn ka dei da ka mithai-byrni lane ka mithai-maw (lane ka mithai-tin). Kham bunsien la ju pyndonkam da ka mithai-byrni.

Ha u khaw-kpu ba la king lang bad ka um-mithai, theh shuh sa khyndiat ka um syaid bad sa king biang. Nangta, ber khyndiat u soda bam khnang ba u kpu un puhaba shet.

Ynda la dep khleh ia u kpu, sa tiew ia ka karai ha ding. Theh umphuiang ha ka karai bad ap haduh ba kan da ih. Tong da ka siang ia u khaw-kpu ba la khleh mithai bad thep ha ka um-phniang ba la ih.

Tang hapdeng 30 sekhon ei ei sa kylla noh ia u pukhleĩn da u narsuh lane da ka siang-peithliew. Tang kumba shiminit ei ei u pukhleĩn u la ih. Khat noh ia u pukhleĩn da ka siang lane suh

da u narsuh bad ieh shuwa shīpor ha-
jrong ka karai ba kan jiar ka umphniang.
Kumne lah ban shet ia u pukhleīñ uwei
hadien uwei.

* Ha ka jaka u soda-bam lah ruh ban pyn-
donkam da u pujew. Ia u pujew lah ban ioh
da kaba pdem um ia u khaw-kpu kumba kat'o
katne sngi. Lada kwah ba u khaw-kpu un jew
kham kloi, pdem um ia u khaw-kpu bad khyndiat
ka um-mithai, Kumta, ia u pujew sa theh
khyndiat ba u khaw-kpu ba la khleh mithai bad
king lang khnang ba u' kpu un phuh haba shet

* Ha ka jaka ka umphniang-bam lah ruh
ban pyndonkam da ka khleiñ-sniang. Ia ka khleiñ
sniang dei ban shet pynum. Nangta sa jiar noh
tang ka khleiñ kaba um bad ia ka phrong-khleiñ
sa weng noh. Tong da ka siang ia u khaw-kpu
ba la khleh mithai bad thep ha ka khleiñ ba la ih.

Ka jingkhleh haba shet :

(1) 1 kīlo u khaw (2) Kumba $\frac{1}{2}$ kilo
tam ka mithai (3) Kumba $\frac{1}{2}$ kilo ka um-
phniang-bam (4) kumba shi khmut sha-
moit-sha u soda bam.

U Pusla lane U Pumithai

Ia u pusla lane u pumithai kl shet da u khaw.

Pdem shuwa ia u khaw ha ka um. Jiar noh ia ka um shuwa ban dung. Dung ia u khaw ha u thlong haduh ban da ni.

Khleh bad khñjot lang ia u khaw-kpu bad khyndjat ka um-mithai. Ka um-mithai ka dei kaba la pynum na ka mithai byrni lane ka mithai-maw da kaba khñlot pynpra ha ka um khlult. Ia kane ka um-mithai dei ban da jiar bha khang ba kan long kaba khuid ban khleh lang bad u khaw-kpu.

Ia u khaw-kpu bad ka um-mithai kaba la khleh pnah sa song ha ka sla. Teh bha ia ka sla da u thri. Thep ia u pumithai ba la song sla ha ka um ba la tiew pynthnam ha ding.

Ynda la kheiñ por ba u la ih, sa khat noh ia u pusla ne u pumithai na ka um-thnam.

U Purynsi

Ia u Purynsi ki ioh na u krai lane u khaw.

(a) U Purynsi uba na u krai :

Sdieh shuwa ia u raitruh ha ka krai. Nangta sa tylllat lane kynrut ha u mawkynrut* haduh ban da long kpu.

Ia u krai uba la long kpu, sa khleh lang bad ka mithai. Ia ka mithai dei ban da pynum shuwa ha ka um da kaba tiew pynkhluit ha ding. Pyndonkam tang khyadiat ka um tang kat ban um ka mithai.

Ka rukom khleh ia u kpu bad ka mithai ka dei ban shoh bha. Khñiot bad sa khem pyllon da ka kti.

(b) U Purynsi uba na u khaw :

Pdem shuwa ia u khaw ha ka um. Jiar noh ia ka um. Thad ia u khaw ba la dep pdem haduh ba un da rkhiang. Nangta sa sdieh ia u khaw.

*U Mawkhynrut — u ia syriem ia u maw tylllat jingsheh, tangba u kham heh bad u long lyngknap. U maw-khun ruh u long lyngkniap.

Dung ha u thlong ia u khaw ba la
dep sdieh haduh ban da ni.

Ia u khaw-kpu sa khleh lang bad ka
mithai. Ia ka mithai dei ban da pynum
shuwa ha ka um da kaba tiew pynkhluit
ha ding. Pyndonkam tang khyndiat ka
um tang kat ban um ka mithai.

Ka rukom khleh ia u khaw-kpu bad
ka mithai ka dei ban shoh bha. Khñiot
bad sa khem pyllon da ka kti.

Ia u purynsi ki ju shna da uba rit.

o0o

KA JASHULIA

Ia ka jashulia ki shet da u khaw-ja
shulia ne u khaw-pnah.

Ban shet ia ka jashulia dei ban pdem
shuwa ia u khaw ha ka um. Nangta sa
jlar noh ia ka um.

Ka jashulia ka ih da ka jinghaw-um.
Ban ioh ia ka jashulia kaba bang dei
ban shet ha u klong. Pynpel thliw ia
u klong na khlieh bad na trai. Ka thliw

ka ban thep khaw lane ka ban sei ia ka jashulia kaba la ih ka dei ban kham heh. Ka thliw ha kaba ka jinghaw um kan rung ka kham rit. Ha ka bynta kaba halor jong kane ka thliw rit ban kiew ka jinghaw-um da buh ne siang da i kynja kriaa ba la thaiñ ni kum ka shalani khnang ba u khaw un ym liat shapoh.

Pynshong ia u klong ha u khiew um ba la tiew pynthnam ha ding. Ia u klong dei ban pynshong ha kata ka rukom ba ka tdong ba pynpei thliw rit, kata ka mut kaba don ka kriaa ba la thaiñ i, un shong halor ka shyntur u khiew-um-thnam. Ia ka bynta ha kaba u klong u shong ha ka shyntur u khiew-um, dei ban da tah da ka jabih * baroh sawdong khnang ba ka jinghaw um kan ym lait mih shabar. Kumta ka jinghaw-um kan kiew beit na ka thliw u klong. Ia ka shyntur u klong kaba halor sa tap da kano kano ka jingtap.

Ynda la kheñ por ba ka jashulia ka la ih, sa weng noh ia u klong na u khiew um-thnam. Khat noh ia ka jashulia ha ka pliang.

*Ka jabih :— Ka dei ka ja kaba la dung lang had u skop kha. Kumta ka jingpnah jong ka ka ia dei ban tah ia u klong.

Ia ka jashulia ka ban leit die sa song
ha ka lakait lane ka lamet.

o0o

U Shira.

U Khasi u pynmih ia u Shira kham
bunsien tang na ka byuta ban bam hi.

Ia u shira la shet ne pyndonkam da
u kba khaw-jashulia (lane u kba khaw-
pnah), u kba khaw mynri, bad na kiwei
de ki kba.

Ia u shira la pyndonkam da u kba
uba la sdang ban ih. Thad malu-mata
ia u kba bad sa sdieh. Mar kumta hi
katba u kba u dang khluit sa dung ha
u thlong. Nangta, sa peh ha u prah.
Pynher noh ia u stait kba bad u shira
un shong ha u prah.

o0o

***Ja-riewhadem bad
U Pyrthiew Riew-- Hadem***

Ha Ri Khasi - Jaiñtia ki thung ia u Riewhadem lieh, u riewhadem stem bad katto katne u riewhadem pyrthiew.

Ia u riewhadem lieh bad u riewhadem stem la pyndonkam ha kaba shetja shet bam sngi ne shet tah sha, bam thang lane shu sdieh haba u dang lung. Ia u riewhadem pyrthiew la pyndonkam ha ka ba sdieh bam sngi ne bam kal. Hynrei ia u riewhadem saw kim ju da kham pyndonkam, kumta kim ju kham rep ia u.

(a) Haba shet ja riewhadem :—

Haba shet ja-riewhadem dei ban da tylliat shuwa ha u mawkynrut. Ynda dep tylliat, sa kyrsih ha ka shalani kaba ni, Ia u riewhadem uba sah ha ka shalani sa jied bha ban shet bamja. Haba shet bamja, ka rukom shet ka iasyriem kumba shet ja, tangba donkam ban king kham bunsien. Ia u riewhadem lah ruh ban shu khleh lang bad u khaw. Dei ban pynthnam shuwa ia u riewhadem haduh ba un da kham jem nangta sa thep khaw. Lah ruh ban thep ia u riewhadem ba la long kpu ynda la jan ih,

shuwa ban rngat um, tangba donkam ban da king bha.

(b) Haba shet ia u riewhadem lung :

(i) Ia u riewhadem uba dang lung lah ban shet da kaba phon ha ka um. Kata ka mut, shet tylli khlem khlai ia ki symboh. Kane ka rukom shet lah ban pied lut ia ki snep bad lah ruh ban ieh lang bad katto katne syrtap ki snep riewhadem. Ia u khiew ba shet lah ban (ap da u snep riewhadem hi.

(ii) Ia u riewhadem uba dang lung lah ruh ban shu syang ha u rnga barhem. Haba syang, lah ban pied lut ia ki snep bad lah ruh ban syang lang bad katto katne syrtap ki snep.

(iii) Nangta, sa kawei pat ka rukom shet ia u riewhadem uba dang lung ka long da kaba shu sdieh. Shuwa ban sdieh, khlai ia ki symboh riewhadem bad sa sdieh ha ka umphniang kaba la tiew pyn-ih ha ding.

(k) Haba shet ia u riewhadem uba law:-

(i) Ia u riewhadem uba law klju khlai bad shet da kaba phon ha ka um. Ka-

ne ka rukom shet ka kham shimpur ba un ih ban la katei ka rukom shet haba u riewhadem u dang lung.

(ii) Sdieh ia u riewhadem uba iaw ba un dup puh pyrthiew. Ia u pyrthiew riewhadem ki pyndonkam ha kaba bam tah sha lane bam kai. Lah ban sdieh ha ka karai kaba don u shyiap ba la tlew pynkhluit ha ding. Lah ruh ban sdieh ha ka tin lane ka jarnar ba rit thlew da kaba syang kyuruh ha ding lane lah ban sdieh ha kano kano ka khiew.

U riewhadem stem um da puh bha haba sdieh. Hynrei u riewhadem-pyrthiew bad u riewhadem - lieh ki puh bha haba sdieh. Ia u riewhadem sdieh u bym puh ki lah ruh ban shu dung pynlwet ha u thlong.

(d) Haba shet ia u riewhadem uba long kpu :-

Ia u riewhadem kpu uba mih na kaba kynrut ha u mawkynrut lah ruh ban shu sdieh tyrkhong khlem um lane lah ban sdieh lang bad ka umphniang bam ne ka khi. Lah ban pyndonkam ia une u riewhadem kpu ha kaba tah sha.

U Piroid

Ia u Piroid * la pyndonkam syriem kum u riewhadem. Bunsien la sdieh pyrthiew ban bam kai lane ban bam tah sha.

Sdieh ia u Piroid ha kano kano ka khiew, kum ha ka karai kaba la tiew pynkhluit ha ding. Thep ia u piroid bad sa king ba un nym ingkhong. Tang shipor, u piroid u la kylla pyrthiew. U pyrthiew piroid u iasyriem bad kham rit ia u pyrthiew riewhadem. U piroid u phuh bha haba sdieh.

*U Piroid u dei-u jait jingthung uba ki ju thung ia syriem kum u riewhadem. U jyntang jong u u iasyriem bad kham rit ia u jyntang sohriew. Ki symboh jong u ki ia syriem kum u sakudana. Ki ju kheit ia u ynda u la law.

o0o

Ka Jakrai

Ki Khasi ki ju rep ia u rai-shan, u rai-truh bad u raisoh.

(a) U 'Rai-shan :

U symboh 'rai-shan u rit ia u symboh khaw. Ia u 'rai-shan ki ju shet bamja lane shet tah-sha.

Ka ja-krai na u raishan :

Thad shuwa ia u raishan ha ka sngi, lane lada pyndonkam tang khyndiat lah ban shu sdieh pynkhluit ha ka karai lane kano kano ka khiew. Nangta, dung ia u ha u thlong. Ynda la dep dung, sa peh nob ia u stait. Ia u 'raishan uba la dep dung khuid sa shet kumba shet ja. Ynda u la ih u iasyriem kum u suji. U 'rai-shan u ih kloi bad u lam byrtem kum u suji.

(b) U 'rai-truh :

U symboh rai-truh u pyllon, u eh u rit bad ia syriem kum u symbai tyrso. Ia u raitruh ki ju kham pyndonkam ha kaba shet kyiad. Haba shet kyiad ki shet kumto khlem da tylliat.

Ka ja-krai na u 'rai-truh :—

Tylliat shuwa ia u rai-truh haduh ban da ni. Haba shet bamja, tiew pynkhluit shuwa ia ka um nangta sa thep khyndiat khyndiat ia u krai-kpu bad king artad

da ka siang haduh ban ða ih. Lah ruh
ban shet lang bad u khaw, tangba dei
ban thep shuwa ia u khaw.

(k) U 'rai-soh :—

U symboh 'raisoh u pyllon kum u
'raitruh. U kham heh khyndiat ia u 'rai-
truh. Ia u soh ki pyndonkam ha kaba
shet-bamja lane tah-sha.

Ka ja krai na u 'rai-soh :—

Tylliat ia u 'rai-soh ha u mawkynrut
haduh ba un da ni.

U 'rai-soh u kham ih slem. Haba
shet dei ban king bunsien. Ka rukom
shet ka ia syriem kumba shet (Ja-riewha-
dam. Haba bamja, u raisoh um da shoh
umshit.

U Rymbai-ja

U Rymbai-ja uba ki Khasi ki ju bam
u don saw jait :

U 'Rymbai-ja uba bthuh u, Rymbai-
ja uba jngem, u Rymbai-ja uba iong bad
u Rymbai-ja uba byrtem jyrngam.

U Rymbai-ja uba hthuh u kham heh
ban ia kitei kiwei ki Rymbai-ja. U Rym-
bai-ja uba sawjngem u kham rit ia u Rym-
bai uba bthuh. U Rymbai-ja uba iong
bad u Rymbai-ja uba byrtem jyrngam ki
ki kham rit shuh shuh ia u rymbai-ja
uba saw jngem

ka rukom shet ia u Rymbai-Ja --

Ka rukom shet ia u rymbai-ja ka ia
syriem kumba shet ja. Haba shet, del
ban theh um haduh ba kan da tap ia u
rymbai. Nangta sa tiew ha ding. Katba
ka um ka nang thnam, u rymbai-ja ruh
u nang jem. Ynda ka um ka la rngat,
sa pelt thuh lada u la jem sa rah noh.
Hynrei lada u dang eh sa theh um biang.
U Rymbai ja um da shim por slem ban
ih. Ka por ban ih ka ia syriem kumba
shetja.

Ia u Rymbai-ja haba bam, lah ban tah lang bad ka mluh. Ia u Rymbai-ja la pyndonkam ha kaba bam kai ne ba tah sha. Don ruh kiba bam kdang kumba bam ja.

o0o

U Phankaro

U Phankaro u don uba lieh bad uba saw.

U Phankaro u don bun jait : U Phankaro-shriew, u phankaro-shiria, u phankaro sawliar, u phankaro-mawshai, u phankaro pathaw.

(i) U Phankaro-shriew u don ka snep kaba saw. Ki sla jong u ki lam byriong ne jngem bad pyllun. U dei u jait phankaro uba bang eh. U phuh bha lada shet ha ka por ba u dang lung.

(ii) U phankaro-shiria u don ka snep kaba lieh. Ki sla jong u ki jyrngam bad pait pnat shiria. U phuh bha haba shet.

(iii) U Phankaro-pyllun ne u phankaro-rysong u don ka snep kaba lieh. Ki sla jong u ki lam byrlieh bad pyllun U pyllun ha ka dur. U phuh bha haba shet.

(iv) U Phankaro-sawllar u don ka snep kaba saw. Ki sla jong u ki pait pnat sawtylli.

(v) U Phankaro-mawshai u don ka snep kaba saw bad stang. Ki sla jong u ki lam byrsaw bad pait pnat kum u phankaro shiria. U jrong lyter ha ka dur. Lada shet u phuh hynrei u jem bun um.

(vi) U Phankaro-pathaw u don ka snep kaba lieh shapoh. Une u jait phan u kham pher ha ka rong. Shapoh u stem kum u pathaw. Um da phuh bad um da bang haba shet.

Ka rukom shet ia u Phankaro :-

Haba shet phankaro dei ban theh um tang khyndiat. Shuwa ban shet bunsien ki da et na khlieh bad na tdong.

Haba bam phankaro lah ban tah lang bad ki kynja jhur kum u jatira, u jamyrdoh, ja-ut, u jangew bad kiwei kiwei.

Ia u phankaro lah ruh ban shu bsuh hapoh u dpei khluit. (Ha ka por thang bun, don ki nongrep kiba ju mlien ban

bsuh ia u phankaro hapoh ka bun ba
dang rhem ding khnang ban ioh bam sngl.)

Ia u phankaro, lah ban sdleh ruh ha
ka umphniang da kaba shu ot lyngkniap.
Kane ka rukom shet ka kham bam duna
ka umphniang.

o0o

U Phan

U Phan u dei uwei na ki jingthung
uba ki Khasi ki ju pyndonkam haba shet
jyntah. Ia une ki ju shet um, shet sboh
lane shet sdieh. Ki ju pyndonkam ruh
ha kaba shet bam sngi.

U Phan u don bun jait.

U phan syntiew ne u phan shisien, u
phan sorkari, u phan jatira, u phan joytl,
u phan saw, 'u phan stem bad kiwei ki-
wei de.

U phan syntiew u dei u jait phan
uba kham bang ban shet jyntah. Ia kiwei
ki jait phan ki pyndonkam ruh haba
shet jyntah.

Khamtam ha ka por tih phan, ki ju shet bam sngi da u phan. U jait phan uba kham ia dei baba shet bam sngi u dei u phan-saw. Kiwei pat ki jait phan kiba kham bang ban shet bam sngi ki dei u phan stem, u phan syntiew, bad u phan-sorkari. Sa kiwei pat ki jait phan ba ki shet ki dei u phan jatira, u phan joyti bad kiwei de.

(1) Haba shet ia u Phan-bam sngi :

Kumba la ong haneng, ha ka por tih phan lah ban shet khleh lang ia u phan uba bha bad u phan Pyut, u phan uba kum puh, u phan uba sohkhruh. Haba shet phan, theh um tang khyndiat. Dei ban da tap bha ia ka jingtap jong u khlew khnang ban nym lait jinghaw. Haba shet ha lyngkha lah ban tap ruh ia u khiew da u stong. Ynda u la ih, sa theh ha ka kriahe ne ka khoh lane ha madan.

Haba bam phan, lah ban tah lang ka mluh, u sohmynten, u piat, ka tungtap, u ja-ut, u bat khliang sylar (lane u bat pyllon ne u bat moina), u jangew bad kiwei kiwei.

(2) Kiwei pat ki rukom shet ia u phan:

(a) Lada kwah sdieh ha ka umphaiang ne ka khleifi siah shuwa ia u suap bad sa ot stang. Nangta sa thep ha ka umphiang.

(b) Don pat kiba da thad tyrkhong shuwa ia uter u phan bala dep ot stang bad nangta sa sdieh

Ka don ruh ki rukom shet phan da kaba sdieh ha ka umphiang hadien ba la dep thep jhur ne thep doh hapoh. Ia kano ka rukom li phon tylli shuwa ia u phan hadien ban da jem ne ih. Nangta ki sa pied neh ia u suap bad sa khleif pynpra badia se ua da pnah. Hapoh une u phan, sa thep kano kano ka doh ne jhur ia kaba la ber ne dep sdieh jyeshoh lypa. Ki pyllor ne lyugknep ia u phan ban tap ia ka doh ne jhur. Kyllan pylleng na jrong u phan bad sa sdieh ha ka umphaiang.

ooo

U Phandieng

U Phandieng ua ki Khosi ki ju kham tung li don njai. U Phandieng lieh bad u Phandieng-saw.

Ia kine ki jait Phandieng lah ban ithuh na u thied sla. U Phandieng-lieh u don ki thied sla kiba lieh. U Phandieng-saw u don ki thied sla kiba saw. Lab ruh ban ithuh na u phan ki. U Phandieng-lieh u lam lieh bad u phandieng-saw u lam sam.

Ia u phandieng-lieh ki ju pyndonkam ha kaba shet bam tah sha bad ha kaba shet bam ja.

Ia u phandieng-saw ki ju kham pyn-donkam ha kaba pdem iad-um. Lada bam palat ia une u jait phandieng u lah ban pynbuid.

Ia u phandieng-lieh lane u phandieng-saw ki ju kham shet da uba dang dep tin. Ia uba la sah bun sngi ki dei ban da pdem um shuwa kumba shimlet armiet ba un nym tyrkhong bad kawei ruh ban kham suk ban khoh ia ka snep.

Shuwa ban shet ia u phandieng, dei ban da khoh ia ka snep. Ka snep ka don ar syrtap, Kaba nador ka stang bad lam byrsaw bad kaba napoh ka rben bad lam byrllieh. Ka snep jong u phandieng ba la dep khoh dei ban theh sha ka jaka bym sot ne ion ki jingai. Kumba shuwa

ban shet ki dei ban da kho' bha ia
ka snep.

(1) Haba shet tah-sha lane shet
bam-kai :—

Ia u phandieng uba la dep kho' snep
sa ot lyngkhot kat ban long thep
ha u khiew shet. Theh um pynduna khyndiat
ha u khiew uba la thep dap u phandieng.
U phandieng uba dang kumba shisnem
u kham ih kloi, hynrei uba la iaw
u kham shim por ban ih. U phandieng
u phuh ynda u la ih.

(2) Haba shet ia u phandieng ban
bam-ja :—

Ia u phandieng uba la dep kho' snep,
sa ot rit bad sa thad tyrkhong ha ka
sngi. Nangta sa dung pynlwet ha u
thlong. Kyrsih ia uba la dep dung ban
long shet.

Haba shet ja phandieng, dei ban shet
shuwa ia u khaw. Ynda u khaw u la
jan ih, sa thep ia u phandieng uba la
long kpu. King da ka khwat (ka kynja
siang) haduh ba un da ih bha. Kane ka
shimpor kumba 15 ne 20 minit ei ei ba
ka ja phandieng kan ih.

Ka Shriew

Ka Shriew ka don bun jait, kum ka riew-kar, riew-saw, ka riewlieh, ka riew-sai, ka riewkhnep, ka riewjrong bad ka riewphyrnap.

Ki jait shriew ba ki ju shet ban bam kdang lane bau bam tah-sha ki dei ka riew-kar, riew-siw, ka riewlieh, ka riew-sai, ka riew-jrong bad ka riewkhnep.

Ka riewkar ka pyllun, ka heh bad ka puh bha haba shet. Ka don kumba 4 ne 5 tylli ki khmat. Ka riewlieh ka heh bad ka lam jem teit teit haba shet. Ka riewsai ka pyllon bad khamrit. Ka riewkhnep ka long kaba doi buu ki khmat. Ka riewjrong ka jrong bad ka heh. Ka riewphyrnap ka jrong lytuiñ.

Ka rukom shet ia ka shriew :-

Ia ka shriew leh ban shet ha kano kano ka khiew. Ia ka um dei ban theh pynduna khyndiat ia ka shriew kaba don ha ka khiew. Ka ding ka dei ban meh bha. Ka don ka jinrong ba ym dei ban rah pynkylla tyllaw ding ba ka por ba shet shriew, hana lada leh kumta ka shriew ka lah ban buid lane bram. Ka riewlieh

bad ka riewsaw ka kham ih kloi. Kiwei ki shriew kum ka riewkar, ka shim por slem ban ih. Kata ka long lada shet mynmiet hap ban ieh sah ha ding haduh mynstep bad shuwa ban thiah da peit ia ka um ha u khiew lada ka la duna sa theh um biang. Kane ka rukom shet dei ban ioh da ka kynja diengmet kaba rhem.

(2) Ia ka shriew lah ban shet bamja bad shet jyntah ruh.


Haba shetja ia ka shriew:—

Ia ka riewkar, khoh snep shuwa bad sa ot stang ban shet. Ka um ban shet bad ka por shet ka long kumba la batai haneng. Donkam ban theh um arsien ne laisien ioh ka rogat noh.

Ynda ka shriew ka la ih, sa thep lang bad u khaw, king bad shet haduh ba kan da ih. Ka ja- shriew ka long teit teit.

Haba shet jyntah, ia ka shriew lah ban shet ruh bad ka doh lane bad u ktung ne ka dohkha.





Ki kot da ujuh u Nongthoh

1. Ka Pung ka Jingieit (*Novel*)
2. U Shanbor & U Wadbor (*Novel*)
3. U Mawjam Jingstad (*Khasi Primer*)
4. Ki Kot Khubor & Ki Kot Khasi
5. Ka Kot Thoh Dak, Klas 'A'
6. Ka Kot Thoh Dak Klass—B
7. *Ka Umpohllew* (Poetry—1982)
8. Ki Nongthoh Kot Khasi—Vol. I (1982)
9. Ki Nongthoh Kot Khasi —Vol II (1982)
10. U Myllung Ka Ri. (Soso Tham—1982)
11. Ka Jingiaishah (*Novel* — 1983, 85) *State Award*
12. Ka Rukom Shet Jingbam Khasi. (1983, 91)
13. *Ka Jingieit* (Poetry & Biria—1986)
14. Nga dang ieit ia phi (April, 87 Sept. 87)
15. Ki Ummat Jingieit (*Short Stories*—1987)
16. Ka Jingieit bajanai ia phi (*Novel*—1987)
17. Ki Biria Dei Por u Sbe Sing (1987)
18. Nga dang kynmaw (Novel—1991)

Ki kot iarap—

Khasi MIL (Paper I & II)

Mathematics, Vol. I Arithmetic

Mathematics, Vol. II (Algebra)

Geography — Question Bank (1974 — 87)

(Q & Ans. on Objective & Problems Longitude)

M. E. Arithmetic (81—89)

Question Bank —

- (a) History (b) Geography (c) English I
(d) English II (e) Science (f) Khasi MIL-I

***La shon ha IBANI Printing Press,
Jaiaw Lan Sona Lane Shillong—2***

Rs. 6/-